



Broj: 02-05-6784-4/14  
Sarajevo, 08.04.2014. godine

Na osnovu čl. 22. i 24. stav 4. Zakona o Vladi Kantona Sarajevo ("Službene novine Kantona Sarajevo", broj: 24/03 - Prečišćeni tekst i 38/13), Vlada Kantona Sarajevo, na **61.** sjednici održanoj **08.04.2014.** godine, donijela je sljedeći

## ZAKLJUČAK

1. Utvrđuje se Prijedlog odluke o pristupanju izradi Strategije razvoja Kantona Sarajevo za period 2014. do 2020. godina.
2. Prijedlog iz tačke 1. ovog Zaključka dostavlja se Skupštini Kantona Sarajevo na razmatranje i donošenje.
3. Ovaj Zaključak stupa na snagu danom donošenja, a objavit će se u Službenim novinama Kantona Sarajevo.

**P R E M I J E R**

**Suad Zeljković**

Dostaviti:

1. Predsjedavajuća Skupštine Kantona Sarajevo
2. Skupština Kantona Sarajevo
3. Premijer Kantona Sarajevo
4. Ministarstva Kantona Sarajevo x12
5. Za objavu u "Službenim novinama Kantona Sarajevo"
6. Evidencija
7. A r h i v a



web: <http://vlada.ks.gov.ba>  
e-mail: [vlada@vlada.ks.gov.ba](mailto:vlada@vlada.ks.gov.ba)  
Tel: + 387 (0) 33 562-068, 562-070  
Fax: + 387 (0) 33 562-211  
Sarajevo, Reisa Džemaludina Čauševića 1



**BOSNA I HERCEGOVINA  
FEDERACIJA BOSNE I HERCEGOVINE  
KANTON SARAJEVO  
VLADA KANTONA**

**PRIJEDLOG**

**O D L U K A  
O PRISTUPANJU IZRADI  
STARTEGIJE RAZVOJA KANTONA SARAJEVO  
ZA PERIOD 2014. DO 2020. GODINE**

**OBRADIVAČ:**  
Zavod za planiranje razvoja  
Kantona Sarajevo

**Sarajevo, mart/ožujak 2014. godine**

Na osnovu čl. 18. tačka b) Ustava Kantona Sarajevo ("Službene novine Kantona Sarajevo", br. 1/96, 2/96, 3/96, 16/97, 14/00, 4/01, 28/04 i 6/13), Skupština Kantona Sarajevo, na sjednici održanoj \_\_\_\_\_, donijela je

**O D L U K A**  
**O PRISTUPANJU IZRADI**  
**STARTEGIJE RAZVOJA KANTONA SARAJEVO**  
**ZA PERIOD 2014. DO 2020. GODINE**

Član 1.  
**(Uvod)**

Pristupa se izradi Strategije razvoja Kantona Sarajevo za period 2014. do 2020. godine (u daljem tekstu: Strategija).

Član 2.  
**(Vremenski period za koji se donosi Strategija)**

Strategija iz člana 1. ove Odluke donosi se za period od sedam godina, odnosno za period od 2014. do 2020. godine.

Član 3.  
**(Metodologija izrade Strategije)**

Metodologiju izrade Strategije čine:

1. Vodeći principi planiranja,
2. Ključne faze u procesu planiranja razvoja,
3. Metodološki okvir za upravljanje razvojem,
4. Ključne faze u procesu realizacije.

Član 4.  
**(Vodeći principi)**

Vodeći principi planiranja i upravljanja razvojem Kantona zasnivaju se na vodećim principima planiranja u EU i dosadašnjim naprednim praksama razvojnog planiranja u BiH:

- **Održivi razvoj**, koji u kontekstu sveobuhvatnog pristupa planiranju i upravljanju razvojem, kroz integraciju mjera privrednog rasta, zaštite okoliša i sveukupnog poboljšanja kvalitete života, uzima u obzir prava i potencijalne potrebe budućih generacija;

- **Integriran pristup**, koji podrazumijeva da se razvoj posmatra na cjelovit način te da se kroz horizontalnu integraciju u istu ravan svrstavaju sve njegove dimenzije – ekonomska, društvena, okolišna i prostorna.
- **Modularni pristup**, koji podrazumijeva vertikalnu integraciju gdje kanton pri izradi Strategije uzima u obzir prioritete iz strateških dokumenata Federacije kao i jedinica lokalne samouprave i gdje su strateški ciljevi Federacije, kantona i jedinica lokalne samouprave usklađeni sa strateškim ciljevima državnog nivoa vlasti i definisanog strateškog okvira Evropske unije;
- **Participacija**, koja podrazumijeva djelotvorno učešće relevantnih aktera iz javnog, privatnog i nevladinog sektora u procesu razvojnog planiranja i realizacije prioriteta na nivou kantona;
- **Standardizacija** podrazumijeva da Strategija koristi iste vodeće principe, karakteristike i pristup izrade, realizacije, monitoringa i evaluacije strateških dokumenata kao i strateški dokumenti u FBiH.
- **EU-harmoniziran pristup**, koji podrazumijeva da se u procesu strateškog planiranja redovno prate prakse i trendovi Evropske unije u ovoj oblasti. Pored toga, kroz definiranje strateških prioriteta kantona dat će se doprinos programiranju BiH za fondove EU kroz uključivanje prioriternih projekata i inicijativa “odozdo prema gore“, a koji su identificirani na lokalnom i kantonalnom nivou, te će se na taj način stvoriti baza razvojnih projekata koji su spremni za finansiranje u okviru EU fondova.

Utvrđeni principi omogućiti će da integrirana Strategija razvoja Kantona Sarajevo postane ključni strateško-planski dokument Kantona, koji podstiče razvoj cijele teritorije Kantona i predstavlja putokaz za sveukupni razvoj Kantona, uzimajući u obzir sve njegove dimenzije: ekonomsku, društvenu, okolišnu i prostornu.

#### Član 5.

#### **(Ključne faze u procesu planiranja razvoja)**

Proces planiranja razvoja sastoji se od sljedećih ključnih faza:

- **pripremna faza,**
- **faza izrade strateške platforme,**
- **faza programiranja,**
- **faza izrade operativnog dijela integrirane strategije razvoja.**

#### Član 6.

### (Pripremna faza)

**Pripremna faza** je prvi dio procesa planiranja razvoja. Cilj ove faze je mobiliziranje aktera i pokretanje procesa planiranja i obuhvata sljedeće glavne korake:

- formalno iniciranje procesa planiranja (politička odluka);
- uspostavljanje i pripremanje tima za planiranje;
- mapiranje zainteresiranih učesnika;
- uspostavljanje inicijalnog partnerstva i pokretanje procesa.

#### Član 7.

Vlada Kantona će svojim odlukama uspostaviti operativna i konsultativna tijela u procesu planiranja razvoja.

#### Član 8.

Operativna tijela u procesu planiranja:

- Izvršno i operativno tijelo u procesu izrade integrirane Strategije je **Zavod za planiranje razvoja Kantona Sarajevo**, stručna institucija zadužena za koordinaciju i tehničko vođenje procesa planiranja, a kasnije i realizacije, monitoringa i evaluacije Strategije.
- **Kantonalna ministarstva uspostavljaju/unapređuju odgovarajuće strukture za planiranje i upravljanje razvojem** koje aktivno sudjeluju u procesu izrade Strategije iz ugla datog sektora i osiguravaju usaglašavanje sektorskih prioriteta sa integriranom Strategijom razvoja Kantona.
- **Kantonalni odbor za razvoj (KOR)** je operativno tijelo zaduženo za provođenje procesa planiranja na nivou Kantona kroz koje se osigurava horizontalna koordinacija između svih institucija na nivou Kantona, kao i vertikalna koordinacija sa jedinicama lokalne samouprave u sastavu Kantona i višim nivoima vlasti. KOR broji 15 – 25 članova, uključujući predstavnike kantonalnih ministarstava i stručnjaka za sve sektore od značaja za razvoj Kantona, predstavnike Grada i općina u sastavu kantona, kao i predstavnike civilnog društva i poslovne zajednice. KOR priprema stratešku platformu razvoja Kantona, uključujući analizu stanja i definiranje razvojnih ciljeva i pririteta, kao i operativne elemente Strategije. Po usvajanju Strategije KOR nastavlja funkcionirati kao međuinstitucijsko tijelo zaduženo za realizaciju, monitoring, evaluaciju i izvještavanje o Strategiji.
- **Tematske (sektorske) radne grupe** su operativna tijela koja KOR-u pružaju stručnu podršku pri izradi razvojnih mjera i programa u specifičnim oblastima (npr. energetika, transport, itd.), kao i pri izradi operativnih dijelova Strategije (akcioni i finansijski plan). Tematske radne grupe uključuju 5 - 15 članova kantonalne

administracije i/ili stručnjaka iz privatnog, javnog i nevladinog sektora za konkretnu oblast, uključujući i relevantne predstavnike pojedinačnih jedinica lokalne samouprave, a formiraju se po potrebi i zavisno od tematskih/sektorskih prioriteta.

#### Član 9.

Konsultativna tijela u procesu planiranja:

- **Vijeće za razvojno planiranje i upravljanje razvojem Kantona Sarajevo** je šire konsultativno tijelo Vlade Kantona koje ima savjetodavnu ulogu u procesima definiranja, realizacije, monitoringa, evaluacije i izvještavanja o realizaciji razvojnih prioriteta u Kantonu, i djeluju u skladu sa načelima partnerstva i saradnje. Vijeća Kantona čine: Premijer Kantona, Gradonačelnik Sarajeva, načelnici svih jedinica lokalne samouprave u sastavu Kantona, predstavnici sindikata, poslodavaca i nevladinih organizacija koje djeluju na području Kantona. Vlada Kantona svojom odlukom utvrđuju način izbora članova, način rada Vijeća Kantona i izvršavanja administrativno-tehničkih poslova, dok stručne poslove za potrebe rada Vijeća Kantona vrši Zavod za planiranje razvoja Kantona Sarajevo.
- **Kolegij načelnika** je mehanizam za osiguravanje vertikalne integracije i zastupljenosti interesa lokalnog nivoa u procesima razvojnog planiranja i realizacije strateških prioriteta Kantona. Okuplja Premijera Kantona, Gradonačelnika i načelnike jedinica lokalne samouprave u sastavu Kantona. Kolegij načelnika usaglašava razvojnu viziju, prioritete i razvojne ciljeve Kantona, osiguravajući koherentnost lokalnog i kantonalnog nivoa u sistemu planiranja.

#### Član 10.

##### **(Faza izrade strateške platforme)**

**Strateška platforma** je temeljni dio Strategije, kojim se usmjerava razvoj teritorije kantona. Usvaja se na Skupštini Kantona Sarajevo.

Integrirani, strateški dio dokumenta Strategije razvoja Kantona ima sljedeću minimalnu orijentacionu strukturu:

- izvod iz situacione analize;
- strateško fokusiranje;
- vizija razvoja;
- strateški ciljevi razvoja;
- prioriteti;
- veza sa planskim dokumentima viših i nižih nivoa vlasti.

#### Član 11.

##### **(Faza programiranje)**

Programski dio Strategije ima sljedeću orijentacionu strukturu:

- Prioriteti i mjere koje uključuju, razvojne programe i projekte sa definiranim očekivanim rezultatima, indikatorima, rokovima i nosiocima odgovornosti i finansijskim okvirom;
- Indikativni finansijski okvir sa projekcijom izvora finansiranja za razdoblje implementacije strategije;
- Institucionalni i organizacijski okvir za implementaciju;
- Modaliteti monitoringa, evaluacije, izvještavanja i revizije strategija razvoja.

#### Član 12. (Faza operacionalizacije)

Operativni dio Strategije definiše subjekte koji provode Strategiju i resurse na kojima će zasnovati sprovođenje Strategije. Sastoji se od trogodišnjeg akcionog plana koji sadrži sve mjere planirane za trogodišnji period, njihov finansijski okvir (uključujući izvore finansiranja), dinamiku realizacije i nosioce odgovornosti za realizaciju mjera.

Trogodišnji akcioni plan služi kao direktna podloga za izradu programa javnih investicija i budžeta Kantona i ažurira se svake godine prema tzv. *rolling* modelu, odnosno principu 1+2.

Trogodišnji i godišnji akcioni planovi trebaju biti sastavni dio godišnjih programa rada Vlade Kantona, ministarstava, javnih službi i agencija, a gdje je to relevantno, i u godišnjim planovima rada jedinica lokalne samouprave u sastavu Kantona.

#### Član 13. (Ključne faze u procesu realizacije Strategije)

Realizacija Strategije odnose sa na godišnji ciklus upravljanja razvojem i obuhvata sljedeće faze:

- Izrada budžeta i programa javnih investicija,
- Izrada godišnjeg plana rada kantonalnih institucija,
- Realizacija mjera/programa sadržanih u okviru godišnjeg plana rada,
- Monitoring realizacije mjera, evaluacije i godišnje izvještavanje.

#### Član 14. (Izrada budžeta i programa javnih investicija)

Efektivno i sistemsko planiranje i upravljanje razvojem podrazumjeva povezivanje razvojnih ciljeva i prioriteta na horizontalnom i vertikalnom nivou i povezivanje finansijskih planskih dokumenata čime se stvara osnova za stvarnu realizaciju razvojnih prioriteta.

Nakon usvajanja Strategije, trogodišnji Akcioni plan sa prioriternim mjerama, programima i projektima i finansijskom projekcijom sa izvorima finansiranja predstavlja polaznu osnovu za izradu Dokumenta okvirnog budžeta i Programa javnih investicija Kantona.

Zavod za planiranje razvoja Kantona Sarajevo, odnosno odgovarajuće strukture za planiranje i upravljanje razvojem u kantonalnim ministarstvima, učestvuju u procesu usklađivanja budžeta i programa javnih investicija sa razvojnim prioritetima iz usvojene Strategije u saradnji sa ministarstvom finansija.

#### Član 15.

##### **(Izrada godišnjeg plana rada kantonalnih institucija)**

U cilju osiguranja praktične realizacije strateških prioriteta, kantonalna ministarstva i druge institucije u svoje programe rada dužni su da uvrste i programsko-projektne aktivnosti, definirane trogodišnjim akcionim planom. Na taj način se obezbjeđuje da i razvojne aktivnosti budu uvrštene u plan aktivnosti kantonalnih institucija i definira se konkretna institucionalna odgovornost za realizaciju razvojnih prioriteta.

Svaka kantonalna institucija priprema svoj trogodišnji plan rada po tzv. *rolling* sistemu, gdje se plan rada priprema detaljno za prvu godinu i indikativno za naredne dvije, a ažurira se svake godine. Na taj način osigurava se veza sa budžetskim ciklusom, kao i usklađenost rada pojedinačnih planova rada ministarstava i njihovo objedinjavanje u plan rada Vlade Kantona.

#### Član 16.

##### **(Rok za pripremu i izradu Strategije)**

Rok za izradu Strategije je 20 (dvadeset) mjeseci od stupanja na snagu ove Odluke.

Utvrđuju se rokovi po fazama izrade Strategije kako slijedi:

- Donošenje Odluke o pristupanju izradi Strategije razvoja KS  
Rok: mart 2014. godine
- Osnivanje operativnih i konsultativnih tijela za planiranje (pripremna faza)  
Rok: maj 2014. godine
- Izrada Strateške platforme Strategije razvoja KS  
Rok: decembar/januar 2014. godine
- Izrada programskog dijela Strategije razvoja KS  
Rok: mart/april 2015. godine
- Izrada operativnog dijela Strategije razvoja KS  
Rok: juli 2015. godine
- Podnošenje Nacrta Strategije razvoja KS Vladi KS na razmatranje i usvajanje



Rok: septembar 2015.

- Usvajanje Strategije razvoja KS na Skupštini KS  
Rok: decembar 2015.

#### Član 17.

##### **(Način osiguranja sredstava)**

Ukupna sredstva potrebna za izradu Strategije razvoja Kantona Sarajevo iznose 500.000 KM, a obezbijediće se na sljedeći način:

- a) Iznos od 60.000 KM nepovratnih sredstava obezbijediće se putem sufinansiranja izrade Strategije od strane Švicarske agencija za razvoj i saradnju (SDC) i Razvojnog programa Ujedinjenih naroda (UNDP) kroz projekat Integriranog lokalnog razvoja (ILDLP), a koja će se koristiti za tehničku podršku u pripremi i izradi Strategije razvoja, što je definirano posebnim sporazumom o saradnji SDC, UNDP i Kantona Sarajevo.
- b) Iznos od 20.000 KM za sufinansiranje tehničke podrške obezbijediće Vlada Kantona Sarajevo u Budžetu Kantona Sarajevo za 2014. godinu na razdjelu 27. Zavod za planiranje razvoja Kantona Sarajevo.
- c) Iznos od 420.000 KM koji se odnose na izdatke za materijal i usluge obezbijediće Vlada Kantona Sarajevo, putem Budžeta Kantona Sarajevo na razdjelu 27. Zavod za planiranje razvoja Kantona Sarajevo, na sljedeći način:
  - U Budžetu KS za 2014. godinu iznos od 120.000 KM,
  - U Budžetu KS za 2015. godinu iznos od 300.000 KM.

Ukoliko se tokom izrade Startegije ukaže potreba za dodatnim istraživanjima, studijama ili analizama, Nositelac pripreme Startegije će, putem Budžeta Kantona Sarajevo, obezbijediti neophodna sredstva za takva istraživanja, studije ili analize.

#### Član 18.

##### **(Odredbe o javnoj raspravi i donošenju Startegije)**

Vlada Kantona Sarajevo će Nacrt Startegije staviti na javni uvid i raspravu u trajanju od 60 dana.

Vlada Kantona će oglasiti putem sredstava javnog informisanja detalje javnog uvida i rasprave.

Nakon sumiranja rezultata javne rasprave Vlada Kantona će, putem Zavoda za planiranje razvoja Kantona Sarajevo, pripremiti prijedlog Startegije i dostaviti Skupštini Kantona Sarajevo radi donošenja.

Uz Prijedlog Startegije Vlada Kantona je dužna Skupštini Kantona Sarajevo dostaviti, uz obrazloženje, prijedloge i mišljenja na Prijedlog Startegije, date kroz javnu raspravu.

#### Član 19.

##### **(Nosilac pripreme za izradu Strategije i Nosilac izrade Strategije)**

Nosilac pripreme za izradu Strategije je Vlada Kantona Sarajevo (u daljem tekstu: Nosilac pripreme Strategije).

Nosilac pripreme Strategije će Nosiocu izrade staviti na raspolaganje dokumentaciju neophodnu za izradu Strategije.

#### Član 20.

Nosilac izrade Strategije je Zavod za planiranje razvoja Kantona Sarajevo (u daljem tekstu: Nosilac izrade Strategije).

#### Član 21.

##### **(Učesnici u izradi Strategije)**

Učesnici u izradi Strategije su nadležni organi uprave Kantona, Grada i općina, javna preduzeća iz oblasti privrede i javna komunalna preduzeća, pravna lica nadležna za vodoprivredu, šumarstvo, poljoprivredu, saobraćaj, energetiku, rudarstvo, turizam, zdravstvo, obrazovanje, kulturu, zaštitu kulturno-historijskog i prirodnog naslijeđa, zaštitu okoliša, organi nadležni za odbranu, privredne komore, društva i druga pravna lica nadležna za komunalne djelatnosti, predstavnici vjerskih zajednica, vlasnici i korisnici nekretnina i svi drugi subjekti koji iskažu svoj interes za uključivanje određenih oblasti u proces izrade Strategije.

Nosilac pripreme Strategije i Nosilac izrade Strategije će, kod izrade Strategije, angažovati naučne institucije (Akademiju nauka BiH, fakultete i institute), kao i pojedince, koji su priznati stručnjaci iz raznih oblasti koje se budu obrađivale kroz izradu Strategije.

#### Član 22.

##### **(Drugi elementi specifični za područja planiranja)**

Nosilac pripreme Strategije će izraditi Program uključivanja javnosti u proces pripreme i izrade Strategije iz člana 1. ove Odluke.

#### Član 23.

Nosilac pripreme Strategije dužan je osigurati saradnju i usaglašavanje stavova sa učesnicima u izradi Strategije, odnosno sa relevantnim učesnicima u njenoj pripremi, izradi i provođenju.

#### Član 24.

Vlada Kantona Sarajevo, kao Nosilac pripreme Strategije, će putem resornih ministarstava Kantona obezbijediti sredstva i uslove da se Nosiocu izrade Strategije stavi na raspolaganje dokumentacija relevantna za izradu Strategije.

Ukoliko su tako raspoloživi dokumenti u pojedinim slučajevima nedostatni, Nosilac pripreme Strategije će, na prijedlog resornog ministarstva, osigurati dodatna istraživanja (studije ili ekspertize) i za to osigurati posebna potrebna sredstva u Budžetu Kantona Sarajevo.

#### Član 25.

Nosilac izrade Strategije dužan je Strategiju izraditi u skladu sa podacima koji su mu stavljeni na raspolaganje i pribavljeni od nadležnih organa, institucija i pravnih lica u toku pripreme za izradu Strategije, a od značaja su za ujednačeni, sveobuhvatan i dinamičan razvoj Kantona Sarajevo.

#### Član 26.

Ova odluka stupa na snagu osam dana od dana objavljivanja u “Službenim novinama Kantona Sarajevo”.

Broj: \_\_\_\_\_  
Datum, \_\_\_\_\_

Predsjedavajuća  
Skupštine Kantona Sarajevo

Prof.dr. Mirjana Malić

## **O B R A Z L O Ž E N J E**

### **Pravni osnov**

Ustavni osnov za donošenje Strategije je član 18. stav 1. tačka b) Ustava Kantona Sarajevo prema („Službene novine Kantona Sarajevo“, br. 1/96, 2/96, 3/96, 16/97, 14/00, 4/01, 28/04 i 6/13) kojem je Skupština Kantona Sarajevo nadležna za donošenje zakona i drugih propisa u okviru izvršavanja nadležnosti Kantona.

Vlada Kantona Sarajevo je Zaključkom Broj: 02-05-12/14 od 14.01.2014. godine (Službene novine KS br. 3/14) dala saglasnost za pokretanje inicijative za izradu Strategije razvoja Kantona Sarajevo za period 2014. do 2020. godine i zadužila Zavod za planiranje razvoja Kantona Sarajevo da pripremi Odluku o pristupanju izradi Strategije razvoja Kantona Sarajevo za period od 2014. do 2020. godine.

### **Razlozi donošenja odluke**

- Izrada i donošenje Strategije razvoja Kantona Sarajevo je nužna obzirom da se postojeća Strategija razvoja Kantona Sarajevo (usvojena 1999. godine) odnosi na period do 2015. godine;
- Integrisana strategija razvoja Kantona Sarajevo do 2020. je strateški dokument Kantona koji usmjerava razvoj Kantona, utvrđuje prioritete u razvoju i predstavlja putokaz za sveukupan razvoj;
- Obaveznost izrade strategije nalažu i nova zakonska rješenja u oblasti razvojnog planiranja u Federaciji BiH. U proceduri je izrada Zakona o strateškom planiranju i upravljanju razvojem u Federaciji BiH i izmjena Uredbe Vlade Federacije BiH koja regulira pitanja strateškog planiranja;
- Obaveznost izrade Strategije proizilazi iz evropske prakse i dinamike strateškog planiranja;
- Zahvatanje sredstava iz predpristupnih fondova EU nalaže obaveznost izrade strateških razvojnih dokumenata;
- Dokument se radi u skladu sa evropskom praksom i dinamikom strateškog planiranja (2014. do 2020. godine);
- Strategija je podloga za donošenja Programa javnih investicija Kantona Sarajevo i Budžeta Kantona Sarajevo, s kojim sve treba da čini koherentnu cjelinu.

Na taj način Strategija je osnova za donošenje operativnih odluka o javnim investicijama, poduzimanje mjera iz oblasti ekonomskog, socijalnog i prostornog razvoja i osiguravanje potrebnih resursa za njihovo provođenje, odnosno alat za upravljanje razvojem Kantona i Budžeta Kantona Sarajevo.

Metodologija izrade Strategije temeljiće se na novim zakonskim rješenjima koji treba da sistemski predlože jedinstvenu metodologiju izrade razvojnih dokumenta iz oblasti socio-ekonomskog i okolinskog razvoja, a čija je procedura pripreme u toku u Federaciji BiH. Zakonom će se urediti osnovni elementi strateških dokumenta razvoja i način njihovog

donošenja, te vertikalna i horizontalna koordinacija svih nosilaca aktivnosti strateškog planiranja.

Smatramo da je pravi momenat da Skupština Kantona Sarajevo donese odluku o pristupanju izradi Strategije razvoja Kantona Sarajevo za period 2014. do 2020. godine, kako bi se pravovremeno obezbijedio kontinuitet u društveno-ekonomskom planiranju i nakon 2015. godine. Takođe smatramo da je prijedlog blagovremen i radi obezbijedivanja potrebnih budžetskih sredstava za 2014. i 2015. godinu.

### **Sredstva**

Ukupna sredstva potrebna za izradu Strategije razvoja Kantona Sarajevo iznose 500.000 KM, a obezbijediće se na sljedeći način:

- d) Iznos od 60.000 KM nepovratnih sredstava obezbijediće se putem sufinansiranja izrade Strategije od strane Švicarske agencija za razvoj i saradnju (SDC) i Razvojnog programa Ujedinjenih naroda (UNDP) kroz projekat Integriranog lokalnog razvoja (ILDLP), a koja će se koristiti za tehničku podršku u pripremi i izradi Strategije razvoja, što je definirano posebnim sporazumom o saradnji SDC, UNDP i Kantona Sarajevo.
- e) Iznos od 20.000 KM za sufinansiranje tehničke podrške obezbijediće Vlada Kantona Sarajevo u Budžetu Kantona Sarajevo za 2014. godinu na razdjelu 27. Zavod za planiranje razvoja Kantona Sarajevo.
- f) Iznos od 420.000 KM koji se odnose na izdatke za materijal i usluge obezbijediće Vlada Kantona Sarajevo, putem Budžeta Kantona Sarajevo na razdjelu 27. Zavod za planiranje razvoja Kantona Sarajevo, na sljedeći način:
  - U Budžetu KS za 2014. godinu iznos od 120.000 KM,
  - U Budžetu KS za 2015. godinu iznos od 300.000 KM.

Ukoliko se tokom izrade Startegije ukaže potreba za dodatnim istraživanjima, studijama ili analizama, Nosilac pripreme Startegije će, putem Budžeta Kantona Sarajevo, obezbijediti neophodna sredstva za takva istraživanja, studije ili analize.

### **Karakteristična pravna rješenja**

Član 1. – ovim članom se otvara proces izrade Strategije razvoja Kantona Sarajevo.

Član 2.- ovim članom se definiše period za koji se donosi Strategija.

Članovi 3. – 15. – ovim članovima je definisana metodologija izrade Startegije i njene operacionalizacije.

Član 16. – ovim članom su definisani rokovi pojedinih faza izrade Startegije, a ukupan rok za izradu Strategije je 18 mjeseci.

Član 17. – ovim članom se definiše način osiguranja sredstava.

Član 18. – ovim članom se definiše obaveza provođenja uključivanja šireg društvenog verifikovanja Startegije i uticaja na izradu iste.

Članovi 19. i 20. definišu nosioca pripreme za izradu Strategije i Nosioca izrade. Nosilac pripreme je Vlada Kantona Sarajevo, a Nosilac izrade je Zavod za planiranje razvoja Kantona Sarajevo.